

DOMENIE II DI PASCHE

Antifone di jentrade 1 P 2,2

Come frututs a pene nassûts, bramait il lat no pastielât de peraule, par podê cressi parie viers de salvece, aleluia.

Si dîs Glorie a Diu.

Colete:

Diu di eterne misericordie,
che an par an tal tornâ de fieste di Pasche
tu impiis la fede dal popul che ti è consacrât,
fâs cressi in nô la gracie che tu nus âs dade,
par che ducj a rivin a rindisi cont pardabon
cun ce purificazion che a son stâts lavâts,
cun ce spirt rigjenerâts, cun ce sanc sfrancjâts.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 2,42-47

Ducj chei che a crodevin a vivevin insiemi e a metevin dut in comun.

Dai Ats dai Apuestui

I fradis a jerin salts tal scoltâ la dutrine dai apuestui e tal volêsi ben, tal crevâ il pan e tal preâ. A jerin ducj plens di teme e no si rivave a contâ i spiei e i miracui che a fasevin i apuestui. Ducj chei che a crodevin a metevin dut in comun; a vendevin ce che a vevin e ce che a cjapavin de lôr robe lu spartivin in ducj seont che i coventave a ognun. Ogni dì a jerin impreteribil tal templi, ducj in buine armonie, e a crevavin il pan tes lôr cjasis mangjant la bocjade cuntun cûr content e sclet. A laudavin Diu e la int ju viodeve di bon voli.

Peraule di Diu.

SALM RESPONSORIÂL dal Salm 117

R. O vin viodût, o Diu, i spetacui dal to boncûr.

O ben:

R. Aleluia, aleluia, aleluia.

Laudait il Signôr, parcè che al è bon,
parcè che il so boncûr al è par simpri.

Che lu disi Israel:

Il so boncûr al è par simpri.

Che lu disi la cjase di Aron:

Il so boncûr al è par simpri.

Che lu disin chei che a rispjetin il Signôr:

Il so boncûr al è par simpri. R.

Mi àn dât une grande pocade par che o colàs par tiere;
ma il Signôr al è vignût in gno jutori.
Mê fuarce e gno cjant al è il Signôr,
al è lui che mi à salvât.
Scriui di gjonde e di vitorie
tes tendis de int juste! R.

La pierre che i muradôrs le vevin butade di bande
e je diventade il cjantonâl.
A fâ dut chest al è stât il Signôr;

e je une robonone pai nestrîs vôi.
Cheste e je la zornade che le à fate il Signôr:
gjoldin e fasin fieste. **R.**

SECONDE LETURE 1 Pi 1,3-9

Nus à fats tornâ a nassi par une sperance vive, midiant de resurezion di Jesù Crist dai muarts.

De prime letare di san Pieri apuestul

Benedet seial Diu e Pari dal Signôr nestri Jesù Crist; te sô grande misericordie lui nus à fats tornâ a nassi midiant de resurezion di Jesù Crist dai muarts, par une sperance vive, par une ereditât che no va di mâl, che no si sporcje e no si fraidès. E je metude di bande intai cîi par vualtris, che la fuarce di Diu us vuarde midiant de fede par chê salvece che no starà trop a pandisi tai ultins timps.

Par chel gjoldêt, ancje se cumò us tocje di jessi un pôc avilîts par tantis provis; par che il valôr de vuestre fede, cetant plui preseade dal aur che si lu spurghe cul fûc seben che al è destinât a sparî, al deventi une reson di laude, di glorie e di onôr cuant che si pandarà Jesù Crist. Vualtris i volês ben, ancje se no lu vês viodût, e cumò o crodês in lui cence viodilu. Par chel o sês incolms di une gjonde gloriose e che no si rive a contâle, sigûrs di rivâ là che e brame la vuestre fede, ven a stâi la salvece des animis.

Peraule di Diu.

CJANT AL VANZELI Zn 20,29

R. Aleluia, aleluia.

Âstu crodût, Tomâs, parcè che tu mi âs viodût?

Furtunâts chei che a àn crodût cence viodi.

R. Aleluia.

VANZELI Zn 20,19-31

Vot dîs dopo, al rive Jesù.

Dal vanzeli seont Zuan

Sore sere d'in chê di, la prime de setemane, intant che a jerin sieradis lis puartis dal lûc là che a jerin i dissepui par pôre dai Judeus, al rivà Jesù e si fermà tal mieç di lôr e ur dîs: «Pâs a vualtris!».

E dopo dit cussi ur mostrà lis mans e il flanc. I dissepui si jemplarin di gjonde viodint il Signôr. Po ur tornà a dî: «Pâs a vualtris! Come che il Pari mi à mandât me, cussi jo us mandi vualtris». E dopo dit cussi al soflà sore di lôr e ur dîs: «Cjapait il Spirtu Sant: a di chei che ur perdonarês i pecjâts, ur saran perdonâts; a di chei che no ur ai perdonarês, ur restaran no perdonâts».

Tomâs, un dai Dodis, che i disevin Zimul, nol jere cun lôr cuant che al rivà Jesù. I disevin chei altris dissepui: «O vin viodût il Signôr!». Ma lui ur rispuindè: «Se no viôt tes sôs mans il segnâl dai clauts e se no met la mê man tal so flanc, no crodarai gran».

Vot dîs dopo, i siei dissepui a jerin un'alte volte in cjase e cun lôr al jere ancje Tomâs. Al rive Jesù cu lis puartis sieradis e si fermà tal mieç di lôr e ur disè: «Pâs a vualtris!». Po i dîs a Tomâs: «Met il to dêt culi e cjale lis mê mans, e slungje la tô man e metile tal gno flanc, e no sta jessi plui cence fede ma un che al crôt». I rispuindè Tomâs e i disè: «Signôr gno e Diu gno!». I dîs Jesù: «Âstu crodût parcè che tu mi âs viodût? Furtunâts chei che a àn crodût cence viodi!».

Jesù, in presince dai dissepui, al fasè tancj altris spiei, che no son ripuartâts in chest libri. Chei chi a son stâts ripuartâts par che o crodedis che Jesù al è il Crist, il Fi di Diu, e, crodint, o vedis la vite tal so non.

Peraule dal Signôr.

Si dîs O crôt.

Su lis ufiertis

Acete di bon voli, Signôr,

lis ufiertis de tô int (e dai tiei gnûfs fis)

in mût che, daspò di jessi rigjenerâts

cu la profession dal to non e cul batisim,
a puedin cuistâsi l'eterne contentece.
Par Crist nestri Signôr.

Antifone a la comunion cf. Zn 20,27

Slungje la tô man e tocje il puest dai clauts,
e no sta jessi plui cence fede ma un che al crôt, aleluia.

Daspò de comunion

Diu onipotent, danus par plasê la gracie
che il misteri di Pasche che o vin ricevût
al operi cence padin intai nestris cûrs.
Par Crist nestri Signôr.